

7/ eis maximum incessit conflictum; in cuius belli principio comes Tripolitanus a suis secedens, locum, quem defendendum acceperat, Saracenis concessit. Sane per maximum diei spacium commisso acerimo bello, et infinitis utraque cadentibus, quod sine lacrymis vix dicere quimus, capta est a Saracenis Crux Domini, captus est rex Guido et Guilielmus [A] marchio de Monte Ferrato, et fere ceteri de praelio, aut ibi cecidere, aut arctissimis traditi sunt custodiis. Tunc nominatus comes, alter actibus Iudas, cum multis Saracenis arma Christianorum habentibus Ierusalem festinanter perrexit [a], quasi defensurus civitatem. Qui a civibus gratanter in civitatem receptus, [b] clericos et laicos, senes cum junioribus, viros cum mulieribus [c] capitaliter [d] jugulari praecepit. Simile quoque scelus [e] in civitate Acri operari nequaquam [f] erubuit. Audiens uxor ejus tantam virum suum exercuisse tyrannidem, quod spreta Christianitate, cuidam filiae Saladini nubere tenebatur [g], tempore congruo, quasi secunda Iudith, vitam ejus extinxit, et dignam vicem [h] viro pro meritis reddens, civitatem Tripolim, confidens in Domino, ab inimicis defendere minime dubitavit. Saladinus vero totum regnum Hierosolymitanum, praeter Tyrum et Tripolim, tyrannice tunc [i] devastavit.

Quando Conradus de Monteferrato patrem suum,
obsessum in civitate Tyri, liberavit.

CAP. CI.

1/ In diebus illis (82), cum esset in Graecia Conradus [j] de Monteferrato, filius domini Guilielmi marchionis, cognito tanti casus tantaeque moestitiae dolore, cum paucis italicis quos secum habebat, Tyrum properavit, et accepto dominio, civibus quasi jam desperantibus, a Saladino qui eam obsidebat civitatem defendit, cum quo multa committens praelia [k], dominum Guilielmum patrem suum proprium [l] et multos alios recuperavit ex laqueis captivos (83).
2/

[a] festinanter perrexit. Sic lego. In C. V., festinantes perrexerunt. — [b] in civitatem receptus. Sic lego. In civitate receptus, C. M.; in civitatem recipientibus, C. V. — [c] viros cum mulieribus, Codd., non, ut aliis videtur: viris et mulieribus. — [d] capitaliter. Sic legit Cl. Mitt.; captos, habet C. V. — [e] simile quoque scelus. Sic C. M. legit Cl. Mitt.; simile quamquam scelus, C. V. — [f] operari nequaquam, Cl. Mitt.; patrare nunquam, C. V. — [g] nubere tenebatur. Sic Codd.; sed Cl. Mitt. corrigendum putat: nubere tentabat. — [h] et dignam vicem, C. M.; et digne vicem, C. V. — [i] tyrannice tunc, C. M.; tyrannide tunc, C. V. — [j] in Graecia Conradus. Sic lego. Codices habent, Conradus. — [k] praelia, C. V.; bella praelia, C. M. — [l] patrem suum proprium. Sic lego, et sic habet C. V. At Cl. Mitt. legit patrem suum, scilicet proprium.

[A] Is fuit Guilielmus senior, pater illius Guilielmi, de quo alibi jam dictum. Profectus enim erat in Terram Sanctam, tum venerandi causa Sepulchrum Christi, tum nepotis curam assumendi.